

COLOSENSES

Yi Necy Huidi San Pablo Yajnigujx Je Mibijcpidijc Jim Colosas

1 Hich Pablo, Dios jadu'n tzojcp, paady Jesucristo ti xyajñibicyich jēbi ngapxhuācxyich yi 'y'ayuc. ²Hich miid ajt nmigüg Timoteo cham nguexyich jada necy ma miich ajcxy huidibi tzinaayb jim Colosas. Hue' nguexyich jada necy ma miich ajcxy huidibi Dios yjāy'ajtip e mmibijccixy yi Cristo. Huen iich ajt nDios Teedy etz ajt nHuindzin Jesucristo may'ajt oy'ajt tunipy miid miich ajcxy etz xyajjotcugñigixip.

Pablo mibijctzoy Dios miid mibijcpidijc ycixpi

³Jabom jabom co iich ajcxy Dios nmibijctzoy, chi nyajñaxich jāygidaacin ma Dios, nHuindzin Jesucristo ajt yTeedy, miid miich ajcxy ycixpi. ⁴⁻⁵Ti nnejhuñyich jadu'n nej miich ajcxy ti mmibijccixy Cristo Jesús, e nañ jadu'n nej mdzojccixy mjiñhuiygixy tüg'óciy migügtijc. Miid co miich ajcxy mjiñp'ixy co Dios miidity tijaty yujcpicy tzajpjoty huidibi miich ajcxy mbadamyb, paady ycixpi ajcxy mmibijccixy Cristo

Jesús, e paady ycixpi mdzojccixy mjiñhuiygixy migügtijc. Co jayhuin migügtijc capxhuācxy Jesucristo y'ayuc ytiy'ajt ma miich ajcxy, huin'it ti mnejhuiygixy co Dios miidity tzajpjoty huidi njiñp'ijxyp mbadaangixp. ⁶Jadayaabi tiy'ajt huidibi migügtijc ti capxhuācxy ma miich ajcxy, nañ yajcapxhuācx'adiitzni ma tüg'óciy naax cajp etz mayjāy mjiñpidaaccixy. Miich ajcxy ti mmibijccixy jadu'n nej oga'n yajñimiydacy e chambaadni co Dios may'ajt ti tuñ miid jāy ajcxy ycixpi, e nañ miich ajcxy mnejhuiyb tiydudägy Dios ytiy'ajt. ⁷Jada tiy'ajt ti xyajnejhuiygixy je Epafras, iich ajt nmigüg huidibi ooy ndzocy njihuñyich, huidibi tudägy tumb ma Dios y'ayuc quipxyi miid iich. Epafras ti xycodināyich ma miich ajcxy, e tiydudägy miich ajcxy xyaj'ijxpicy Cristo ytiy'ajt. ⁸Epafras ti xyajnejhuñyich tiy'ajt jadu'n nej miich ajcxy myajpatcixy, etz jadu'n nej je Espíritu Santo ymic'ajt xymooygixy, jigix ajcxy mdzogipy mjiñhuihuipy tüg'óciy migügtijc.

⁹Miid jada ycixpi iich ajcxy jabom jabom Dios nmibijctzooyich miid miich ajcxy ycixpi, jadu'n nduunich chondacy co oga'n nnejhuiyich co miich ajcxy ti mmijpidaaccixy Jesucristo, ixti chambaadni. Dios nmibijctzooybich co ajcxy mhuinjihuihuipy mnejhuihuipy tüg'óciy Dios chojcín. Dios nmibijctzooybich co yí' Espíritu Santo miich ajcxy xyaj'ixpigiipy xyajnejhuihuipy ajcxy tüg'óciy yí' ytiy'ajt etz yí' chojcín. ¹⁰Dios nmibijctzooybich jaydēbi mguyduunip ajcxy Dios ytiy'ajt jadu'n nej huaad mibijcpidijc chinaaygixy huidibi yajpaatp ma ajt nHuindzin Jesús, mabaad Dios jaygidägy yajxon ajcxy mdzinaayin mjugy'ajtin. E nañ jaydēbi ajcxy mdunipy oyjāy'ajtin. E nañ jaydēbi jabom jabom yjacyujcpejtcixy yí' m'ixpijcin ma Dios. ¹¹Dios nmibijctzooybich jigix yí' xymöhuipy ajcxy mic'ajt jadu'n nej yí' miidity ymic'ajt mijpi, jigix jēbi miich ajcxy jotcuje myajnaxipy etz mecxtujctāhuip tüg'óciy tzaachypí etz ayo'n. ¹²Dios nmibijctzooybich co miich ajcxy agujc jotcuje myajnaxipy Dioscojuyip ma Dios Teedy, com Dios Teedy ajt xyajpocyñihuaatzim, e jadu'n ti xyñi'ixhiyim jēbi nbaatim tüg it lugar tzajpjoty quipxyi miid tüg'óciy mibijcpidijc huidibi tiydudägy tzinaaygixp miid Dios ytiy'ajt, jadu'n nipaady nejihuüy nej miich ajcxy mdzinäy ma je tiicxin. ¹³Ti Dios xyajnihuädzictuutim ma yí' jibic-huinma'n ma je mujcu' xy'ane'mim, jadu'n nipaady nejihuüy ti xyajpidzimim

agootztuum. Ti Dios xypidaacim ma y'ung y'ane'my, je' y'ung huidibi yí' ooy tzocy ooy jihuüy. ¹⁴Dios y'ung ti xyajnihuädzictuutim ma yí' jibic-huinma'n co ñi'py temy yojcy ma yí' cruudz miid ajt nbocy ycixpi, e ti xypocyhuinmeecxim.

Co Cristo y'o'cy miid ajt nbocy ycixpi, chi jotcuje n'ijtim miid Dios

¹⁵Ca' pin ti ix y Dios. Pinjaty ti ix y Dios y'ung, jadu'n nipaady nej ti ix y Dios. Dios y'ung yí' je' anajty tim jayijp ma anajty Dios ca' ti yaj'oyiñi. ¹⁶Dios y'ung ti cojtay tüg'óciy tijaty yajpaatp jiiby tzajpjoty etz ya naaxhuiñgixy. Dios y'ung cojtay tüg'óciy huidibi jēbi huaad n'ijxim etz nañ cojtay huidibi ca' huaad pin ix y. Dios y'ung pidaactay tüg'óciy y'ane'min tüg'óciy mic'ajt ya naaxhuiñ, etz nañ jadu'n pidactay ane'min miid yí' tzajpjoty tzinaaybi. Dios y'ung ti yajcojtäy ti yaj'abadiiydäy tijaty miid yigixp. ¹⁷Je Cristo jayijp y'ane'm'ajt ymic'ajt ti paady, ca' jac ni pin. Je Cristo yaj'ijtpy tüg'óciy huidijaty ya yajpatp huijtz'ijtaayb. ¹⁸Je Cristo ñihuindzin'ajttaayb ñigohuajc'ajttaayb, etz y'ane'mdaayb tüg'óciy jay huidibi mibijcip mijpidaacip. Je Cristo yajtzinaayb yajjugy'ajtpy tüg'óciy mibijcpidijc, com yí' je' huidibi jayijp ti yjugypicy co y'o'cy. Paady ycixp yí' cötujcin mijpi miidity. ¹⁹Dios hue' tzojcy co tüg'óciy yí' ymic'ajt etz ymij'ajt yajpaadip ma yí' y'ung. ²⁰Je naaxhuiñyay etz je tzajpjoty tzinaayb ajcxy ca'oy'ijtcixy miid Dios miid je mijpocy ycixpi. Dios oy jaygidägy ooy jotcuje

nayjihuiyi co y'ung y'o'cy cruudzcíxy miid je mijpocy ycixpi e jadu'n oyiiy nej jëbi je naaxhuiñjāy etz je tzajpjoty tzinaaybi ajcxy oy'ijtcixy miid Dios.

²¹⁻²² Miich ajcxy co anajty ca' mmibijccixy je Cristo, ca' anajty oy m'ijtcixy miid Dios. E jadu'n anajty m'ijtcixy nej tūg midzip ma Dios, miid co jibicpi anajty mdungixy, etz miidity ajcxy jibic ma mjoy mhuinma'n. Per jadachambi je Cristo ti capx'oyi miich ajcxy je mdzip m'ejin huidibi ajcxy miid Dios, co ti chināy ya naaxhuiñ miid ñinix, e nañ co ti y'ōgy miid miich ajcxy mbocy ycixpi. Miid co Cristo y'o'cy miid miich ajcxy mbocy ycixpi, jaydëbi myajpáatcixipy ma Dios yhuinduu janch oyjāy, janch huätzjāy, ca' ti pocy mmiidity, ca' ti xihuín yjac-hui'my ma Dios miid miich ajcxy ycixpi. ²³ Pen myajcopijccixyp tiydudāgy je Cristo y'ayuc ytiy'ajt huidibi ti mmidoogixy, jadu'n nej mijp'ljxcixy co je Cristo xyajnidzōgaani ajcxy yi m'alma. Je ayuc huidibi miich ajcxy ti mmidooy, je' je' huidibi migügtijc ti capxhuācxy etz ycapxhuācx'adiichñi ma tug'óciy naax cajp, jadu'n nej jëbi jāy ajcxy y'alma yajnidzōgipy. Nañ jadu'n iich, Pablo ngapxhuācxypich jada ayuc quipxy miid nmigügtijcich.

**Pablo cōtujemoy co ytunipy
ma mibijcpidijc ajcxy**

²⁴ Jotcujc nnayjihuiyijich co tzaachypi nminaxy nyajnaxyich miid nninixcixh miid miich ajcxy ycixpi e jadu'n njacyajcixy njacyajca'pxich je tzaachypi

huidibi Cristo yajtzondac co yi' tzaachypi minaxy yajnaxy miid je mibijcpidijc ycixpi e je mibijcpidijc ni paady nej Cristo ñinix. ²⁵ Dios ti xyyajñibicyich co ndunipyich miid yi jāy ajcxy huidibi mijpidaacip. Dios ti xypidāgyich ma jada tung, jigix ngapxhuācxibich tūg'óciy Dios y'ayuc ytiy'ajt ma tūg'óciy jāy ajcxy. ²⁶ Jecy'ajty canaag jimijt ti ñaxy co Dios ca'ni anajty yajñiguēxigy yi' ytiy'ajt. Cham Dios ti yajñiguēxigy yi' ytiy'ajt ma yi jāy ajcxy huidibi yi' yjāy'ajtipy. ²⁷ Dios oy nihuinmayiyy co anajty yajnejhuñhua'n yi jāy ajcxy nidūg'óciy je oybi ayuc tiy'ajt huidibi jecy'ajty ca' pin nejhuiy. Yi' je' je' tiy'ajt co Cristo yajpaady ma miich ajcxy mjoy mhuinma'n, paady ycixpi jëbi miich ajcxy mbaadip oy'ajtin jiiby tzajpjoty.

²⁸ Hich ajcxy ngapxhuācxypich Cristo y'ayuc, n'ihuijpyich ngapxhuijpyich, nyaj'ixpijpyich yajxon yi Cristo ytiy'ajt ma tūg'óciy jāy ajcxy, jaydëbi nyajquēxigibich ma Cristo yhuinduu nidūg nidūg mibijcpidijc ca'pxy yhuinma'n. ²⁹ Miid jada ycixpi nduñich mictāgy miid tūg'óciy je nmic'ajtich huidibi Cristo xymooybich jabom jabom.

2 Ndozocpyich co miich ajcxy mnejhuñhuipy jadu'n nej mictāgy nduñich miid tajin mayin miid miich ajcxy ycixpi, etz miid yi mibijcpidijc huidi jim Laodicea ycixpi, etz nañ tūg'óciy mibijcpidijc ycixpi huidibi ti xy'ixyich ahuin ajijp. ² Mictāgy nduñich jaydëbi yi mibijcpidijc paadipy jotcujc'ajtin ma y'ay yjot, etz jaydëbi ajcxy ñaychójcigixipy ñayjihuiyigixipy

mabaad jëbi mi'ljtcixy yjot yhuinma'n tú'ciy. Mictägy nduunich jaydëbi je mibijcpidijc mi'ljtcixy mij jotcuje'ajtin co ajcxy huinjihuïydähuiib Dios ytiy'ajt, je tiy'ajt huidibi jecy'ajty anajty ca' pín nejhuïy, je Dios ytiy'ajt maabi Cristo Jesús. ³Ma je Cristo jím tüg'óciy tiy'ajt janchypi etz ixpijcin janchypi yajpaady. Jadu'n yi' ytiy'ajt etz y'ixpijcin nej tüg jugy'ajtin. ⁴Jadu'n nimaaygixy jigix ca' pín oy cohuin'iini e midigihuipy oy ayuc ma miich ajcxy ooy ymibijcni, e ca'yjanchity. ⁵Ooy iich ngadim jimity, ixna' guëxna' ma miich ajcxy myajpatcixy. ñich njot nhuinma'n ca' yi' jím ytigoy'ity ma miich ajcxy myajpatcixy. Jotcuje nayjihuïyijich co n'ijxcixy yajxon myajtüyöygixy tüg'óciy etz mic yi mmibijcin miidity ajcxy ma Cristo.

⁶E miid jada ycixpi jadun nej miich ajcxy ti mgöbijccixy je Huindzin Jesús oga'n'aty, jadun ajcxy jactzinaaygix jacjugy'ajtcix ma yi'. ⁷Je tiy'ajt etz je mic'ajt jím yi' mbaatcixy ma Cristo. Yjacyujcpedipy ajcxy yi m'ixpijcin ma Cristo ytiy'ajt jabom jabom. Ca' m'ixtigihuäccixy ma yi mmibijcin. Jacmibijcix jadun nej anajty ti nyaj'ixpijccixy Cristo ytiy'ajt. Jatytim myajnájxcixipy jäygidaacin ma Dios cixyjot huinjijot jabom jabom.

**Je jemybi jugy'ajtin huidibi
Cristo xyajni'ixiïyim**

⁸Ooy naygüend'ajtigix, ca' myajhuin'iingixy, co huingjäy xyajhuinma'nytigöoygixipy miid huingbi ayuc huingpi ixpijcin

huidibi jäy ci'm ti cojy ti macxy, huidi ca' choobaady, huidi nigoo yxhachhuin'iingixp miid canaag ayuc huinma'n jadun nej poj naaxhuiñ huinma'n. Yi jadumbi ixpijcin huidibi jäy ti cojy ti macxy ca' ajcxy paady ma Cristo.

⁹Tüg'óciy nej Dios yajpaady nañ jadun yajpaady ma Cristo. ¹⁰Com je Cristo ñihuindzin'ajttaayb tüg'óciy ane'min ya naaxhuiñ, etz nañ jadun tzajpjoty, paady ycixpi co miich ajcxy myajpaady ma Cristo, miich ajcxy miid'ajttaayb tüg'óciy huidi Cristo ymiid. ¹¹Co anajty Cristo miich ajcxy xyjäy'adyii, chi yi'pidacy ma ajcxy mjot mhuinma'n je tiy'ajt co myajpatcixy ma Dios. Hue' je' yajtigooyb yi pocytunii huinma'n. Jada je' je tiy'ajt huidi Cristo Jesús ypidac, ca' miich ajcxy xyjäy'adyii. Ca' miich ajcxy mdiy'ajttiy ma mninïcx. Tigach Jesús ytuuñ miid miich ajcxy, ca' yjadun'ity nej judíojäy ajcxy tiy'ajt pidaaccixy ma ñinïcx miid tzujc. ¹²Co ti mniibejtcixy miid Cristo yxii, jadun nipaady nejihuïy ti mnaaxtigiiygixy quipxyi miid Cristo co yi' ñaaxtigiiy. Co ti mmijpidaaccixy Dios ymic'ajt jadun nipaady nejihuïy quipxyi miid Cristo ti mjugypijccixy co Dios yajjugypijcy y'ung co y'o'cy. ¹³Co ca' anajty miich ajcxy Dios xyjäy'adyii, miid miich anajty ajcxy pocytunii huinma'n jadun miich anajty m'ljtcixy nej öcpi. E co ti mmijpidaaccixy Cristo, Dios ti xyhuinmeecxi ajcxy tüg'óciy mbocy, e jadun nipaady nejihuïy Dios ti xyajjugypijccixy quipxyi miid Cristo. ¹⁴Co Cristo y'o'cy ma

yi cruudz miid ajt nbocy ycixpi, jadu'n nipaady nejihuüy Dios ti xyjödzim xihuín huidi anajty xychaachytunaanim. Co Dios anajty yajtigooy ich ajt nxihuín, jadu'n nipaady nejihuüy ti mijxojtzpety je xihuín necy ma Jesús ycruudz. ¹⁵Co Cristo y'o'cy cruudzcíxy, chi ycödigooy je ca'oybi ymic'ajt, etz je poj naaxhuiñybi ymic'ajt. Chi je Cristo yajtzo'yuñ je ca'oybi etz je poj naaxhuiñybi co yajcixy yajnaxy ma jäy yhuinduu.

**Tzojccix nijot'ajtcix tüg'óciy
huidijaty tzomb ma Dios tzajpjoty**

¹⁶Ca' mdungixy cuenti co pinjaty ajcxy xy'agapxihuipy etz xyñimähuipy:

—Amay'at jada jüicxy picy, etz amay'at jada xii, etz amay'at je jemybo', etz amay'at yi Sábado xii. ¹⁷Jecy'ajty jäy jadu'n ti yajtuñ yijadu'mbi huinma'n, jayijpni ca' anajty Jesucristo ymiñi ya naaxhuiñ. Jadachambi xii tiempo Jesucristo ytiy'ajt tügpajc yi' je' ooy ycopicyity. ¹⁸Ca' huaad yi jäy ajcxy xypijci je Cristo y'oy'ajtin huidibi ajcxy mbadamyb. Yi' ajcxy huidi oygohuin'iñiñ naybidaacip jadu'n nejihuüy ooy yung naxy ajcxy yjäy'ajtcixy, e ca' yjanchity. Yi' ajcxy yi' y'ojadajpty ángeles. Yi' ajcxy naygömayip co ti tiy'ajt patcixy ma cumäy, ninigoob ajcxy amij agix ñayjihuíyigixy miid co tzachmijpidaaccixy yci'mhuinma'n etz ñinícx chojcin. ¹⁹Yi jadu'mbi jäy ca' ajcxy yajpatcixy ma Cristo, je huidibi nigohuajc'ajtp tüg'óciy mibijcpidijc. Je mibijcpidijc Cristo yajyeecp ma ajcxy ymibijcin jadu'n

nej Dios tzocy, e yi' ajcxy patcixy tüg'óciy mic'ajt etz tiy'ajt ma yi'. Miid co Cristo nigohuajc'aty je mibijcpidijc, paady ajcxy y'ijtcixy tügpicy, jadu'n ajcxy nipaady nej tüg jäy ñinícx miid ycohuajc huidi ane'm je ñinícx etz miid emy huidibi yajyücxtaayb je ninícx.

²⁰⁻²¹Co miich ajcxy ti mmibícy Cristo, jadu'n nipaady nejihuüy ti m'öccixy quipxyi miid Cristo, e nañ ti mbidzimgixy ma yi naaxhuiñyjäy yhuinma'n xyaj'ane'mgixy. ¿Na'ámy co chambaad mjactzinaaygixy jadu'n nej jihuüy yi naaxhuiñyjay yhuinma'n xy'ane'mgixy? ¿Na'amy co mjaccuydungixy yi jäy ajcxy ycötujcin huidibi minaamb co ca' huaad mgonígy jada, ni ca' huaad mjüicxy jada, ni ca' huaad nidoñ yijmbi? ²²Tüg'óciy huidibi ngonícin, njiicxim, e nnidonim, co ytundäy, chi ytigoydäy. Yi jadu'mbi huinma'n ci'm jäy ajcxy cojcixy macxcixy, e nañ ci'm jäy ajcxy yaj'ijxpjccixy huidibi ca' yajpaady ma Cristo. ²³Yi jadu'mbi cötujcin jadu'n yquëxígy nej ooy y'oyity ooy y'oymibijco'cnity, e ca' yjanchity. Co jäy ajcxy cuydungixy ooy ajcxy ñaybidáacigixy tudägy, etz nañ chaachtungixy ñícx ycohuajc. Yi jadu'mbi cötujcin ca' ti mic'ajt miidity, com co ca' jadu'n jëb yajtigoy jibic-huinma'n yi jadu'mbi cötujcin.

3 Miich ajcxy huidibi ti mmibícy je Cristo jadu'n nipaady nejihuüy ti mjugypijccixy quipxyi miid Cristo, e jemybi jugy'ajtin ti myajtzondaaccixy. ²Ixtaaygix je tiy'ajt huidibi tzomb tzajpjoty ma je Cristo yajpaady ma Dios ymijc

a'oy'amybi, e yi' je' je mij'ane'mbi.

³Co ti mmibijccixy je Cristo jadu'n nipaady nejjihuüy co ti m'o'ccixy miid yi', etz ma je Cristo jemybi jugy'ájtin miich ajcxy ti mbaady. Jadachambi yi mjugy'ájtin Cristo miid c'i'am, e yi' yajpaatp ma Dios. ⁴Co anajty je Cristo ñayguëxigyii jadüg'oc ya naaxhuiñ, huin'it xii miich ajcxy mnaybada'ñyii miid yi' jiiby tzajpjoty ma yi oybi it.

Je jecy jugy'ajt etz je jemybi jugy'ajt

⁵Yajtigooygix je jibic-huinma'ñ huidibi miich ajcxy miid, huidibi naaxhuiñyäjy ajcxy yhuinma'ñ'ajtip. Ca' huaad miidcapxtigoyipy töxyjäydijc. Ca' huaad jibic-huinma'ñ mdunipy. Ca' huaad mdungixy ninicx chojcin, etz huidibi ca'p y'oyhuinma'ñity. Ca' huaad m'adzogipy comeen'adii, com ñipaapty jadu'n nej ajcxy huidibi tzaadzech quipychech ojadajtp. ⁶Miid co jäy ajcxy jadu'n ytundigooygixy, paady ycixpi jacjiini Dios tzaachytunip jäy ajcxy huidibi ca' ycapxymidoogixy yi' ycötujcin. ⁷Nañ jadu'n miich ajcxy jayijp co ca'ni anajty mmijpidaaccixy je Cristo, mdzinaaygixy anajty miid jibic-huinma'ñ quipxy miid je jacjadyii naaxhuiñyäjy co anajty mguydungixy yi jäy ycötujcin huidibi ca' ytiy'ajtity. ⁸Jadachambi ixmajtzcix miich ajcxy yi jibic-huinma'ñ jadu'n nej co migüg mmijotma'tcixy, jadu'n nej co ooy mjot'ambijccixy, jadu'n nej co jibic mdungixy, jadu'n nej co migüg mnigapxcixy ni'ojiigixy, jadu'n nej co jibic ayuc mgapxcixy. ⁹Ca'

huaad mnayhuin'ñinigixy miñ xyipy. Co ti mmibijccixy Cristo ti m'ixmajtzcixy je jibicjot je jibic-huinma'ñ huidi anajty ajcxy miid.

¹⁰Jemybi jot jemybi huinma'ñ ti mbatcixy e Dios yjacyejcyp jemybi jot jemybi huinma'ñ jabom jabom ma miich ajcxy co m'ixpijccixy yi' ytiy'ajt. Jadu'n Dios tzocy co mjot mhuinma'ñ mbidáaccixy jadu'n nej Cristo jot huinma'ñ miidity, je Cristo huidibi ti yaj'oyüy je jemybi jot jemybi yhuinma'ñ.

¹¹Co jäy ajcxy mijpidägy Cristo, chi tú'ciy ajcxy yajpaady ma Dios, ca' ñejity co nijëjity ajcxy miid griegojäy y'ixpijcin etz jacjadyii miid judíojäy y'ixpijcin, ca' ñejity pen ti myajtiy'ajtti y o ca' mdiy'ajtti yity. Ca' ñejity co nijëjity ajcxy jiguëgy choon, e ca' y'ixpicity, etz jacjadyii ooy adzip ahua'n ñaybidáacigixy. Ca' ñejity co nijëjity ajcxy moso'ajtp etz jacjadyii huidibi ci'm naymiduunip. Nidüg'óciy ajcxy tú'ciy ñaybidägyii co ajcxy mijpidägy Cristo. Nidüg'óciy mibijcpidijc tú'ciy pattay ajcxy mic'ajt oy'ajt ma Cristo, e nañ Cristo yajpaady ma nidüg'óciy ajcxy yjot yhuinma'ñ.

¹²Com Dios miich ajcxy ti xyhuin'ixy, e ti xychojccixy ti xyjihuiygixy, e Dios ti xyajhuädzi ajcxy mjot mhuinma'ñ, paady ycixpi pidaaccix mjot mhuinma'ñ co mba'ayoohuaangixy migügtijc. Pidaaccix mjot mhuinma'ñ co oyjäy'ajtin mdunaangixy etz co nicy xemy mnaybidägaangixy. Pidaaccix mjot mhuinma'ñ yung naxy etz mimecxtujccixy migügtijc ajcxy. ¹³Naymimecxtújcigix

nidüg nidüg. Co mmigüg
ajcxy xymidundigooyipy jëbi
mhuinmeecxipy tim jadu'n nej iich
ajt nHuindzin Jesucristo ti mecxy
miich ajcxy mbocy. Com Cristo ti
xyhuinmeecxcixy, paady copicy
miich ajcxy meecxip yi migüg
huidibi ajcxy xymidundigooyb.

¹⁴Mnaychójcigix mnayjihuiyigix
nidüg nidüg. Co mnaychójcigixipy
nayjihuiyigixipy, chi jëb
huaad mdzinaaygixy miid mjet
mhuinma'n tú'ciy. ¹⁵Je jotcujc'ájtín
huidibi Dios xymooyim, huen
ajcxy xy'ane'mi mjet mhuinma'n.
Dios ti xyajnibjccixy, jaydëb tú'ciy
m'ijtcixy miid mjet mhuinma'n.
Mjatytim yajnaxipy ajcxy
jäygidaacin ma Dios jabom jabom.

¹⁶Naybidáacigix co je Cristo
y'ayuc ytiy'ajt yajtigiiydähuamyb
ajcxy mjet mhuinma'n.
Nayyaj'ixpíjcigix etz nay'iíhuíjigix
naygapxhuíjigix miid je Cristo
y'ayuc ytiy'ajt, jadu'n nej Dios
ijxpíjcin yecy. Ígix Salmo etz ígix
himno etz yi iy huidibi je Espíritu
Santo ypidägip ma mjet mhuinma'n,
e jadu'n jäygidaacin mi'ijtcixy ma
ajcxy mjet mhuinma'n miid Dios
ycixpi. ¹⁷Huen ti ayuc huidibi ajcxy
mgapxyp, huen ti tung huidibi
ajcxy mdumby, hue' capxcix tungix
miid ajt nHuindzin Jesús yxii. Etz
jatytim yajnajxcixy Dioscojuyip ma
Dios Teedy ma Jesucristo yxii.

**Je mibijcpidíjc ajcxy chinaayin
ma ypijccchinaaygixy**

¹⁸Miich töxyjäydíjc ajcxy,
capxymidoogix mñäy ajcxy com
jadu'n iich ajt nHuindzin Jesucristo
tzocy co mgapxymidohuipy

ajcxy mñäy. ¹⁹Miich yëydíjctíjc
ajcxy, tzojccix jihuiyigix ajcxy
mdöxyíjc, ca' ejcin mmi'ídiipy
miid mdöxyíjc. ²⁰Miich ajcxy ung
anäg, mgapxymidohuipy ajcxy
mdaj mdeedy miid tüg'óciy. Jadu'n
Dios jäygidägy co ung anäg ajcxy
capxymidooy ytaj yteedy. ²¹Miich
ajcxy ungdeedy ca' oyñinej
mmigapxcixy m'ung m'anäg ajcxy.
Co jadu'n oyñinej m'ojipy m'ung
ajcxy, ca' yjocyty co nicxy ajcxy
taj may chinaaygixy yjugy'ajtcixy.
²²Miich ajcxy tumbidíjc,
capxymidoogix yi mHuindzin, ca'
janch xypaat oy mic mdungixy co
mhuindzin jim xyhuindiicxcixy,
e chi co je' yjihuäcni, chi nigoo
mhuäccixni mdinaaygixni. Hue'
janchtiy oy tungixy miid oyjot
oyhuinma'n, com je' je' je tiy'ajt
co Dios mhuindzigiigixy. ²³Je
tung huidibi mdungixyp, tungix
cixyot huiníjot. ²⁴Com miich
ajcxy mnejhuiyb co Cristo
xymöhuaangixy it lugar tzajpjoty,
paady ycixpi oy tunggix jigix Cristo
jäygidägipy huidibi ajcxy mdumby.
²⁵Dios chaachytunipy pinjaty
tundigooyb. Ca' Dios huin'ijxpety
tzaachytunipy jäy.

4 Miich ajcxy yajtumbidíjc,
yajtungix mdumbi nej ypadyii
etz nej ytudägyity, com miich ajcxy
mnejhuiyb co nañ miid miich ajcxy
tüg mHuindzin jiiyby tzajpjoty.

²Jabom jabom Dios
mibijctzoogix, ca' m'ixmajtcixy
Dios mibijctzoohuin. Huijy
ycujc m'ídiipy ajcxy etz jatytim
yajnajxcixy jäygidaacin ma Dios
co anajty mgapxtaaccixy. ³Nañ
jadu'n miich ajcxy tun may'ajt

mibijctzoogix Dios miid iich ajcxy ycixpi. Mibijctzoogix Dios co huen it lugar xymöhuibych ma jëbi ngapxhuäcxyich Dios y'layuc ytiy'ajt. Ngapxhuäcxyñich je Cristo ytiy'ajt huidibi jecy'ajty anajty ca' pin nejhuüy. Miid co ngapxhuäcxyich Cristo ytiy'ajt, paady ycixp nyajpaadyich pujxtigoty. ⁴Mibijctzoogix Dios miid iich ycixpi, jigix jëbi ngapxhuäcxyich je Cristo ytiy'ajt huädz oy, nej jäy ajcxy jëb huädz huinjihuüygixy, jadu'n nej ypadyii ngapxhuäcxyibych.

⁵Tiydudägy mdzinäaygixipy miid yi jäy ajcxy huidibi ca' mibijccixy Cristo. Yajniguëxëccix miich ajcxy Dios ytung jabom jabom, ca' huaad xii tiempo myaj'ayoogixy. ⁶Yi mgapxin yi mmiydaacin yajtungix oy'amy huindzigi'n'amy nej jëbi huaad jäy ajcxy jäygidaaccixy. Copicy mhuinmayipy ajcxy jayijp nej jäy huaad m'adzoogixy.

**Je capxpoocxin huidibi
cogixiiyñip je ñecy**

⁷Tíquico co ñicxipy jim ma miich ajcxy, yi' xyyajmiidmiydáaccixipy tüg'óciy nej ytunyii yjadyii ma iich. Ooy ndzocy njihuüyich iich ajt nmigüg Tíquico. Yi' ooy tudägy ytuun quipxyi miid iich ajcxy ma ajt nHuindzin Jesucristo ytung. ⁸Paady yam nguexyich Tíquico ma miich ajcxy jigix ajcxy xyajmiidmiydägipy nej yam iich ajcxy nyajpaatcixy, etz nañ jigix xyjotmëcmigäpxcixipy. ⁹Quipxyi miid Tíquico yam nguexyich Onésimo, tüg ajt nmigüg huidibi ooy ndzocy njihuüyich, huidibi

tudägy ti ytuun miid iich ajcxy. Onésimo miich ajcxy yi mmigogajp. Tíquico y Onésimo xyajmiidmiydägip ajcxy tüg'óciy tijaty tuunip jajtíp yam ma iich ajcxy.

¹⁰Je Aristarco, huidibi pujxtijc iñaayb quipxyi miid iich, cham quexy capxpoocxin ma miich ajcxy. Marcos, je Bernabé y'uch, cham quexy capxpoocxin nañ jadu'n ma miich ajcxy. Ti iich ayuc nguexyich jayhuin ma miich ajcxy co ixypy ñicxy Marcos ma miich ajcxy, mgöbigipy ajcxy agujc jotcuyc. ¹¹Nañ jadu'n je Jesús huidibi jäy ytiyjp Justo, cham quexy capxpoocxin ma miich ajcxy. Yi Aristarco, Jesús etz Marcos yi' ajcxy ni tugiigpajc, judíojäy huidibi tumb miid iich ma Dios ytung co ngapxhuäcxyich Dios y'ane'min. Yi nidugiigpi iich ooy ti xyajjotcuyc'atyich. ¹²Je Epafra, miich ajcxy mmigogajp je Cristo ytumbi, nañ jadu'n cham quexy capxpoocxin ma miich ajcxy. Je Epafra jabom jabom Dios mibijctzoy miid miich ajcxy ycixpi. Yi' mibijctzoob Dios co miich ajcxy cuydunda' tüg'óciy je Cristo y'ayuc ytiy'ajt, etz co nanyéjcigix amumdügjot ma Dios, e jadu'n ajcxy mguydunipy nej Dios tzocy. ¹³Ñich jëbi tiy'ajt nyecyich co Epafra ooy jotmay jihuüy miid miich ajcxy ycixpi, etz nañ ooy nidajy nimay miid yi' ajcxy ycixpi huidibi tzinaayb jim Laodicea etz jim Hierápolis. ¹⁴Je Lucas, je doctor, huidibi je mibijcpidijc ooy tzojccixy ooy jihuüygixy etz Dimas nañ cham ajcxy quexy capxpoocxin ma miich ajcxy.

¹⁵Yajnajxcix iich ngapxpoocxin ma yi mibijcpidijc jim Laodicea. Nañ yajnajxcix iich ngapxpoocxin ma yi Ninfas etz ma yi mibijcpidijc huidibi yöymujccixp ma yi' ytiyc. ¹⁶Co anajty jada necy ti mgapxtaaygixy, tungix may'ajt quejxnajxcix jada necy ma yi mibijcpidijc ajcxy jim Laodicea. Huen ajcxy nañ jadu'n capxcixy jada necy, nañ jadu'n miich ajcxy

capxcix je necy huidibi ti nquexyich jim Laodicea. ¹⁷Tungix may'ajt mnimähuipy je Arquipo co huen cuydundäy je tung huidibi iich ajt nHuindzin je Cristo ti yajnibedyii.

¹⁸Hich Pablo, iich ci'm njaaybich jada capxpoocxin ma miich ajcxy. Ca' ajcxy mjäy digoyipy co iich nbujxtijc iñäy. Huen Dios may'ajt oy'ajt tunipy miid miich ajcxy ycixpi. Jadu'n ngapxcixyich. Amén.